



PROTOCOL

dalla seduta dil cussegl da vischnaunca,
mesjamna, ils 22 da zercladur 2022, allas 19¹⁵ – 21¹⁵
Liug: Cuort Ligia Grischa, Trun

President: Adrian Deflorin

Actuara: Ursina Murer-Fatzer

Presents:

a) Cussegl

Armin Berther	Otmar Flepp
Silvia Bucheli-Caduff	Larissa Fry Schuster
Theres Burri Gadola	Giusep Lozza
Roland Cajacob	Armin Manetsch
Edgar Durschei	Helga Probst-Linder
Adrian Flepp	Ignaz Venzin
Mario Flepp	

Perstgisa Martino Sabbadini

b) Suprastonza
comunala

René Epp	Wendelin Jacomet
Clemens Berther	Paul Flurin Schmidt

Perstgisa Jris Lombris

c) Envidai

Curdin Cajacob, president cumissiun da gestiun
Sonia Lutz-Schmidt, cumissiun da gestiun
Flavio Murer, cumissiun da gestiun

Andri Hendry, canzlist/direcziun comunala
Ervin Maissen, menader infrastruttura/direcziun comunala

Plaid d'avertura dil president

Preziai presents

Cuort Ligia Grischa

Avon cussegl havein nus astgau endriescher enqual caussa davart quei baghetg da gronda valeta culturala e historica. Oz tenin nus era nies cussegl en la biala sala dils caus ligia. In grond engraziament admittel a nossa premurada guida Olivia Pfister-Tgetgel per las explicaziuns historicas dil museum e davart l'exposiziun speciala digl artist da Trun, Alois Carigiet. Medemamein admittel jeu in grond engraziament alla presidenta Justina Simeon-Cathomas, che ha possibilitau a nus d'astgar tener nossa seduta cheu el museum.

Sco nus havein gest udiu ei la Cuort Ligia Grischa in edifices che sudeva duront biars tschentaners alla Claustra da Mustér. Cunzun el temps medieval possedeve la claustra ina gronda pussonza ecclesiastica e profana. Il prenci-avat era responsabels per la val e medemamein protectur dil Pass Lucmagn. En sia funcziun ei la claustra era stada confundatura dalla Ligia Grischa. Biaras decisiuns da gronda muntada han ils representants dalla Ligia Grischa priu gest en questa stanza cheu.

Era questa sera vegn discussiunau e decidiu en questa stanza. Las fatschentas che nus tractein oz han forsa buca la medema impurtonza sco a lezs temps. Per nossa vischnaunca Mustér ein las fatschentas denton segirefranc da gronda impurtonza.

Matura

Ozildi posseda la claustra buca pli quella pussonza profana sco d'antruras. Ei dat era buca pli in prenci-avat. Ozildi ei la claustra plitost enconuschenta sco liug da pastoraziun, reflexiun, seminaris e cunzun sco liug dalla scola gimnasiala. In ni l'auter da nus ha astgau passentar leu bein enqual onn da sia veta per terminar la scolaziun cun maturitad.

Era uonn han 32 gimnasiast(a)s terminau cun success la matura. Denter els ein treis convischins da Mustér, numnadamein: Anna Tuor, Julian Kreiliger e Luca Zanetti. Luca Zanetti ha schizun terminau la matura el rang. Quei han dil reminent mo quater da ses conscolars dumignau. Nus gratulein da cheu anora a tuts treis absolvents per lur honorifica prestaziun. Ei fagess grond plascher sche lur via menass sunter il studi puspei anavos tier nus. Pertgei nus duvrein glied bein scolada per occupar las plazzas en nossa regiun e per sviluppar vinavon nossa patria.

Plazzas da lavur

Ei dat adina puspei bunas, gie fetg bunas plazzas vacantas en nossa regiun. Duas plazzas da cader ch'ei gest el mument libras ein: il post dalla directura da Sedrun Mustér Turissem e tal dil menader pil svilup regiunal Surselva. Sper quellas duas dat ei naturalmein aunc in tschuat bunas plazzas tier las vischnauncas ed interpresas indigenas.

Muort la digren dalla populaziun e dils affons e giuvenils daventa la cumpetiziun denter ils patruns onn per onn pli e pli dira. Beinenqual fatschenta sa deplorablamein buca pli occupar las plazzas d'emprendissadi ni plazzas vacantas.

Enstagl d'occupar las plazzas cun glied qualificada dalla Bassa, fuss ei da beneventar sche las plazzas vegnessen occupadas cun nossa glied qualificada che retorna en patria. Cheu ei il sforz da mintgin da nus dumandaus cun far attents nos confamiliars, parents ed enconuschents en la Bassa sin plazzas vacantas en nossa regiun. Forsa ein las pagas buca sil medem nivel, denton ei tenor miu manegiar il viver tier nus segirefranc pli attractivs. Vivin nus gie en ina regiun nua che auters gaudan lur vacanzas.

Mortoris

Dapi la davosa seduta dil cussegl da vischnaunca ha ei dau dus mortoris:

- Vigeli Lutz-Flepp, naschius ils 26-06-1945 e morts ils 26-05-2022
- Maria Decurtins-Manetsch, naschida ils 21-06-1930 e morta ils 11-06-2022

Naschientschas

Dapi nossa davosa seduta dil cussegl da vischnaunca ha ei dau neginas naschientschas.

Tractandas:

1. Protocol 14-2021/2024
2. Via Raveras: Credit per la sanaziun e completaziun dalla cuvrida (messadi nr. 23-2021/2024)
3. Plan da finanzas 2022-2031 (messadi nr. 24-2021/2024)
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer



Cussegl da vischnaunca 2021/2024
Protocol no. 15
Seduta dils 22-06-2022

1. Protocol 14-2021/2024

Decisiun:

Il protocol nr. 14 dalla seduta dils 12 da matg 2022 vegn approbaus unanimamein.

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer



2. Via Raveras: Credit per la sanaziun e completaziun dalla cuvrida (messadi nr. 23-2021/2024)

Presentaziun

Gerau Wendelin Jacomet:

Sco Vus haveis saviu leger el messadi ei la Via Raveras vegnida sanada la davosa gada avon rodund 22 onns. La Via Raveras survescha buca mo sco access pils habitonts, mobein era per las differentas purschidas dil maun public (*deponia*).

Adina puspei ei vegniu desistiu d'ina cuvrida fina, denter auter era per motivs finanzials. Per mantener ina via a liunga vesta eis ei buca da spitgar aschi ditg cun la cuvrida fina. Igl onn 2020 e 2021 ha la sanaziun dalla deflussiun da plievgia a Raveras stuiu vegnir abolida. Sin quei tschancun ei il catram vegnius remplazzaus. Leu nua ch'ei ha fatg basegns ei la via gia vegnida sanada.

Per la sanaziun e completaziun dalla cuvrida fina dalla Via Raveras ein ils cuosts calculai cun frs. 260'000.--. Ils proprietaris da lingias separticipeschan sin l'entira lingia dalla via cun ina contribuziun da frs. 65'000.--. Cheutras resta ina summa da frs. 195'000.--. Ils cuosts en detagl anfleis Vus sin pagina treis dil messadi.

L'interessenza publica da quella via ei definida a 70% e l'interessenza privata a 30%. En connex culs menaschis publics a Raveras, nua che la vischnaunca ha era da separticipar cun ina cumpart vid l'interessenza privata, ei la summa restonta aschi bassa, ch'ins ei dil meini da desister sin ina procedura da contribuziun. La suprastanza communal fa la proposta al cussegl da vischnaunca da conceder in credit net da frs. 195'000.-- per la sanaziun.

Negin pren il plaid en la debatta d'entrada. Ei suonda la deliberaziun en detagl.

Cussegliaier Edgar Durschei:

Avon rodund 15 onns eis ei vegniu definiu en in document davart talas proceduras. Fuss ei pusseivel da retscheiver quei document? Cun buc vuler introducir la procedura da contribuziun scaffeschan ins pregiudezis. Igl ei indispensabel d'insister sin la procedura da contribuziun.

Gerau Wendelin Jacomet:

Cunquei che la summa pils privats ei aschi bassa, cuosta la procedura dapli che quei ch'ella vala. Dapi che la nova lescha cantunala ei vegnida introducida, ha il document numnau negina valur pli.

Cussegliaier Edgar Durschei:

Co vegnan ins sin ils resultats da 70% (*interessenza publica*) e 30% (*interessenza privata*)?

Gerau Wendelin Jacomet:

La calculaziun ei succedida sin fundament dil diever dalla via. La Via Raveras ei ina via da rimnada cun dabia traffic communal (*deponia*), p.ex. passadis e sendas han ina basa da calculaziun da 20%. La finala resta la decisiun davart la procentuala tier la suprastanza communal. Sch'ei vegn giavischau oz la procedura da contribuziun san ins buc exequir uonn las lavurs previdas.

Menader infrastruttura Ervin Maissen:

La classificaziun ei vegnida definida sin basa dalla planisaziun cantunala e cheutras ei il document communal d'antruras nunvaleivels. Per la calculaziun dat ei negina basa da matrix dils co-factors. La lescha definescha l'interessenza publica per in'avertura generala sco era per in'avertura detagliada. La procedura per ina repartiziun dalla clav da cuosts basegna rodund quater meins senza risguardar proceduras en connex cun eventualas protestas.

Cussegliera Theres Burri Gadola:

La procedura da contribuziun per l'interessenza privata ei d'instradar tenor las ponderaziuns da cusseglier Edgar Durschei.

Cusseglier Ignaz Venzin:

Co ha la calculaziun per la sanaziun dalla via 2020 e 2021 viu ora? Tgei cuosts han ils privats surpriu?

Menader infrastructura Ervin Maissen:

Ils cuosts per la sanaziun sco tala ein vegni adossai cumpleinamein als purtaders dallas lingias d'electricidad e dil provediment d'aua. Cheutras ha la vischnaunca buca giu da purtar ils cuosts per la cuvrida che porta. Medemamein separticipeschans quels purtaders era vid ils cuosts dalla cuvrida fina tenor cumpart dallas lavurs caschunadas entras els.

Cusseglier Roland Cajacob:

Per la sanaziun sco tala ei vegniu introduciu da lezs temps la procedura da contribuziun e cheutras han convischin(a)s era surpriu ina cumpart dils cuosts. Tier la decisiun finala eis ei impurtont da differenziar d'ina via cumpleinamein privata enviars ina via cun dabia traffic public. Fuss ei tenor lescha pusseivel da classificar auter?

Gerau Wendelin Jacomet:

La repartiziun da cuosts stuess succeder en plirs scalems cun risguardar las distanzas tier las casas. Tenor explicaziuns dil menader infrastructura ei la cumpart en connex cun las lingias da provediment (*electricidad ed aua*) vegnida surprida dils caschunaders e la part sura da Raveras ei vegnida repartida tenor perimeter.

Cusseglier Edgar Durschei:

Il cussegl ha oz buca da decider co ina procedura ha da veser ora per cuntentar convischin(a)s. Nus havein d'agir tenor dretg. Il program d'investiziun che vegn tractandaus pli tard cuntegn pliras vias che vegnan sanadas e che cuostan per part pli pauc che tala da Raveras. Per quellas vias vegn instradau la procedura da contribuziun. La vischnaunca ha avon onns priu sias decisiuns en connex cun quellas proceduras: Ils responsabels ein obligai da tractar tuttas vias tuttina.

La proposta da cusseglier Edgar Durschei secloma sco suonda:

"La suprastanza communal propona al cussegl da vischnaunca da conceder in credit net da frs. 195'000.-- per la sanaziun dalla Via Raveras cun menar atras la procedura da contribuziun per la cumpart privata".

President dil cussegl da vischnaunca Adrian Deflorin:

Propostas san vegnir fatgas e discussiunadas. Alla fin vegn tenor art. 38 a/b/c ni tier pliras propostas art. 38 lit. 2 votau surlunder. Mintga cusseglier(a) ha mo ina vusch.

Ei suonda la votaziun dalla proposta da cusseglier Edgar Durschei.

Cun 12 encunter duas vuschs e neginas abstenziuns approbescha il cussegl da vischnaunca la proposta da cusseglier Edgar Durschei.

Cunquei che tut(ta)s cusseglier(a)s han gia votau succeda negina votaziun per la proposta dalla suprastanza communal.

Decisiun:

Per la sanaziun dalla Via Raveras vegn concediu in credit net da frs. 195'000.-- cun menar atras la procedura da contribuziun per la cumpart privata.

Cussegl da vischnaunca Dissentis/Mustér
Il president: L'actuara:

Adrian Deflorin

Ursina Murer-Fatzer



3. Plan da finanzas 2022-2031 (messadi nr. 24-2021/2024)

Presentaziun

President communal René Epp:

Grazia alla guida atras il museum havein nus saviu guder empau historia ord il temps vargau da nos antenats. Nies futur porta medemamein sias sfidas (*digren dalla populaziun*). Il plan da finanzas ei in impurtont instrument da planisaziun. Quei plan ei medemamein vegnius discussiunaus cun la cumissiun da gestiun. La nova planisaziun da finanzas dependa dils resultats effectivs annuals. Concret duei l'altezia dallas investiziuns en media dils proxims tschun onns buca survargar la media dils cash-flows effectivs annuals dils davos tschun onns. Quei agir garantescha a nus pils proxims 10 onns ina planisaziun da finanzas sauna, cunzun suenter las investiziuns grondas el Center Fontauna.

Ils proxims 10 onns sa vegnir quintau cun in cash-flow da 75% dalla media dils davos tschun cash-flows (2017-2021). Quei munta pigl onn 2022 in cash-flow planisau dad 1'684'228 francs. Ils proxims 10 onns vegn quintau cun investiziuns nettas da rodond 66% dalla media dils cash-flows dils davos tschun onns (2017-2021), quei che munta pigl onn 2022 1'482'121 francs.

Ils departaments han planisau investiziuns nettas da 23'629'900 francs (2022-2031). Ils detagls tier mintg'investiziun per departament ein visibels el program d'investiziun. Tenor plan da finanzas 2022-2031 sedat in potenzial d'investiziuns da total 26'821'208 francs. Cheutras vegn buca nezegiau diltuttatfatg il potenzial d'investiziuns, quei che dat empau spazi e reserva sch'ina u l'autra investiziun survargass las cefras planisadas.

Ils proxims 10 onns vegn l'atgna finanziaziun (*cash-flow*) buc a saver cuvierer tuttas investiziuns nettas previdas (*denter auter la grond'investiziun el Center Fontauna*). Il grad d'atgna finanziaziun en % demuossa quei fetg bein. Cunzun ils emprems onns dalla planisaziun da finanzas ei il grad d'atgna finanziaziun sut 100%. Cheutras sto la vischnaunca empristar capital per saver realisar tuttas investiziuns previdas. Ils deivets a liung termin vegnan a crescher sin varga 20 milliuns francs. Tonaton restan ils deivets nets per habitont en in'altezia supportabla (*astgan buc survargar frs. 5'000.-- per habitont*). Il plan sa variar dad onn tier onn e gest tenor situaziun.

Ei succeda la discussiun generala.

Cusseglia Mario Flepp:

Tenor program d'investiziun eis ei previu in acquist da terren pil Center dil vitg il qual vegn budgetaus cun treis ga frs. 500'000.--. San ils responsabels gia informar davart il project e las finamiras?

President communal René Epp:

La cumissiun che duei elaborar las mesiras per augmentar l'attractivitat da nies vitg ei dapi entgin temps vid la lavur. Ina mesira impurtonta ei quei acquist da terren. Ils discuors cun ils possessurs occuoran. Questa stad s'entaupan representants dalla vischnaunca cun ils possessurs per dilucidar las ideas, anflar sligiazions sco era per retscheiver ina calculaziun da cuosts per la cumpra da quei terren entras la vischnaunca. La cumissiun preveda da saver presentar ils resultats quest atun.

Cusseglia Mario Flepp:

Han ins en mira igl acquist dil terren cul baghetg? En tgei stan sesanfla quei baghetg? Eis ei previu da cumprar il terren e baghetg e silsuenter da surdar p.ex. ad ina cassa da pensiun

per la realisaziun dil project. La vischnaunca persula sa buca realisar in project da tala dimensiun.

President communal René Epp:

Nies intent ei d'acquistar terren e baghetg.

Gerau Paul Flurin Schmidt:

Igl ei buca la finamira che la vischnaunca ei investura, mobein la vischnaunca duei saver reglar e dictar igl avegnir da quei areal. Ins ha en mira ina concorrenza d'investurs, denton la vischnaunca definescha las cundiziuns. Quei spazi ei il pli impurtont spazi public en vischnaunca. Cheu stuein nus sco vischnaunca esser activs ed evitar ina realisaziun da project entras privats.

Cussegliera Larissa Fry Schuster:

La situaziun davart il provediment da sanadad el futur ei malguessa. Ina pratica da miedi ha saviu reglar sia successiun, las duas ulteriuras buca. Medemamein ei la situaziun actuala cun l'ambulanza buca cuntenteivla. Co vesa il futur sin quei sector ora? Pertgei in bien provediment medicinal en in vitg ei essenzials ed indispensabels. Sur tut quels onns ei vegniu budgetau nuot en quei sector, per tgei motivs?

President communal René Epp:

Ils responsabels ein actualmeins vid il project SanaSurselva nua che tut ils purtaders da prestaziuns ein involvi. Ils resultats vegnan a mussar tgei che succeda el futur (*presentaziun dil project previu igl atun 2022*). Discussiuns occuoran davart in Center da sanadad cumplexiv en vischnaunca includiu las purschidas dalla Puntreis, praticas comunablas da miedis eav. L'idea primara dalla SanaSurselva ei da metter tut las spartas sut in tetg (*evtl. center en la Cadi, in a Glion ed in ella Lumnezia?*). La problematica dall'ambulanza ei enconuschenta. Era cheu vegn la caussa prida serius per anflar a temps bunas e cuntenteivlas sliaziuns. Per quels motivs han ins budgetau nuot sut il program d'investiziun.

Cussegliera Theres Burri Gadola

Fatg ei che nus havein planisau el sector da sanadad absolut nuot e quei pils proxims diesch onns. Sche SanaSurselva presenta igl atun ils resultats stuessen ils cuosts previ pil project esser planisai enzanua. Denton nua?

President communal René Epp:

Tenor las discussiuns ch'occuoran duess la nova organisaziun finanziar sesez. Sin ina moda ni l'autra han las vischnauncas ell'entira regiun da separticipar vid ils cuosts. Ils miedis ein involvi en las gruppas da lavur. SanaSurselva sez ha gia investau tschiens mellis francs en quei project. Ils detagls en caussa suondan a temps.

Cusseglier Adrian Flepp:

La vischnaunca Tujetsch ha concediu gia igl onn vargau in credit da frs. 320'000.-- per la pratica a Sedrun ed ha cheutras medemamein anflau ina successura per la pratica. Igl ei denton impurtont da definir ina summa da reserva per talas caussas (*à fonds perdu*) el program d'investiziun per che nus seigien prompts d'agir a moda speditiva.

Cusseglier Mario Flepp:

Igl onn 2019 han ins investau frs. 395'000.-- el plaz-scola Cons. Pigl onn 2027 ein ulteriurs frs. 150'000.-- previ pil plaz-scola. Tgei succeda cun quella summa?

Gerau Wendelin Jacomet:

Igl ei previu da sanar il plaz-scola q.v.d igl access (*via*) ed il plaz avon l'entrada (*plattas*).

Cusseglier Otmar Flepp:

Las enormas investiziuns el Center Fontauna cloman era suenter entradas supplementaras. Ton pli eis ei per uniuns ni gruppas da sport buca capeivel daco ch'ellas anflan negin plaz el Center Fontauna per motivs che gruppas pli grondas prendan si gl'entir areal e quei sur jamnas. Piardan ins cheu buca dabia daners cun in tal agir? Co prevedan ins egl avegnir las reservaziuns da talas dimensiuns?

Gerau Clemens Berther:

Pil mument ei ina gruppa da Varese (IT) per treis jamnas cun 200 affons el Center Fontauna. Quei ei correct che tals han affittau per quei temps gl'entir center, independent sch'ei fan diever da tut las localitads ni buc. Quella gruppa paga era leusunter. Talas entradas vegnan gruppas indigenas resp. camps en vischnaunca buca da cuvierer.

Cusseglier Otmar Flepp:

Igl ei buca capeivel daco ch'ins sa buca schar vi hallas vitas ad ulteriurs clients sche la gruppa basegna buca gest ellas.

Gerau Clemens Berther:

Igl ei buca correct da schar vi ina halla dublamein. La gruppa ha reservau e pagau duront quei entir temps (*pachet*). Per las gruppas grondas ei buc il dormitori attractivs, mobein las purschidas.

Cusseglier Armin Berther:

En connex cun l'ambulanza - in crap da scarpetsch ei d'anflar personal scolau. In impuls; promover la promoziun da giuventetgna per la scolaziun en la sparta da sanadad.

La problematica da hallas occupadas el Center Fontauna – cheu vegn cussegliu da colaborar cun la claustra. Pertgei sias hallas ein per gronda part dil temps vitas.

El program d'investiziun preveda la posiziun "Economisaziun rufids e molocs" ina summa da frs. 900'000.--. Per tgei intent?

Tgei ei planisau cun la tualetta publica a Segnas (*frs. 90'000.--*)?

Co stat ei cun l'Ovra Acletta? Il project dad 11 milliuns francs prevedeva da lezs temps recavs frs. 200'000.--/onn. Havess quei buca da figurar enzanua el program d'investiziun?

Gerau Paul Flurin Schmidt:

"Economisaziun rufids e molocs" – frs. 900'000.--. La cumissiuon aveva previu el project in niev stabiliment a Raveras sco era da reveder la lescha davart l'economisaziun da rufids. Sco enconuschent ei quei project vegnius partius en duas parts. Igl emprem ha la lescha da vegnir revedida e la finanziaziun garantida avon che vuler meglierar ils indrezs. Muort las investiziuns els proxims onns han ins priu il conclus da persequitar il niev stabiliment a Raveras pér igl onn 2027.

Gerau Wendelin Jacomet:

Tualetta Segnas - frs. 90'000.--. La gruppa d'interess Nordic Segnas ha giu tschentau la damonda da construir tualettas sco era ina gardaroba en casa da scola. Plinavon han ils responsabels giu persequitau ina tualetta el contuorn dalla senda da viandar. Avon entgin temps ha Nordic Segnas retschert dalla vischnaunca in scriver per prender posiziun resp. d'inoltrar in concept concret als responsabels communalis.

President communal René Epp:

Ovra Acletta – la tematica ei aunc en sclariment. Il cussegl vegn informaus a temps.

Cusseglier Edgar Durschei:

Tgei ha la cumissiuon da gestiun rapportau en connex cul plan da finanzas?

Ovra Acletta (*KEV*) – l'incarica pertuccont ils sclariments necessaris ei gia vegnida surdada a caschun dalla tractaziun dil quen annual. In biro d'inschignier savess segirefranc sclarir quei fatg a temps.

Co vesa ina contribuziun en favur dalla punt pendent ora?

Surpassadi Segnas MGB - quella tematica manca medemamein el program d'investiziun.

Medemamein vegn rendiu attent da menziunar ina summa ella sparta da sanadad. Quei punct sa era vegnir numnaus autruisa sco p.ex. sustegn per l'economia e sanadad.

Igl ei pliras gadas vegniu menziunau ch'il cussegl astga buca tractar messadis resp. projects ch'ei buca risguardai el program d'investiziun.

President communal René Epp:

Projects en general ch'ei buca integrat el program d'investiziun, che la suprastonza communal valetescha denton sco impurtonts, presenta ella al cussegl da vischnaunca independentamein dil program d'investiziun. Secapescha che la suprastonza communal informescha il cussegl davart l'influenza sil resultat dil program d'investiziun. Actualmein ha la suprastonza communal buca giu endamen davart in sustegn finanziel per La pendent ora. Aschiditg che l'uniun ha buca rimnau ils daners necessaris conceda la suprastonza communal neginas contribuziuns. El mument che l'uniun ha contonschiu sia finamira dils 1.1 milliuns francs san ils responsabels da La pendent ora inoltrar alla suprastonza communal ina damonda per in sustegn.

Gerau Wendelin Jacomet:

Surpassadi MGB Segnas – sin fundament dallas discussiuns el cussegl da vischnaunca dil november 2021 ha la suprastonza communal contactau a scret ils responsabels dalla MGB e descret l'intenziun dalla vischnaunca. Dapi il december 2021 ha la suprastonza communal udiu nuot pli dils responsabels dalla MGB.

President cumissiun da gestiun Curdin Cajacob:

Bugen havess la cumissiun priu il plaid all'entschatta dalla fatschenta. La cumissiun da gestiun exprima buca directamein siu meini. Las discussiuns resp. ses inputs ein vegni drizzai directamein alla suprastonza communal. Sco ins vesa ein grondas investiziuns previdas. Il cash-flow dad 1.4/1.5 milliuns francs en media ei plitost mudests. Gest tenor ils resultats els proxims onns entscheivan las reponderaziuns davart las investiziuns necessaris e forsa meins necessarias. Per la cumissiun da gestiun eis ei plascheivel ch'il plan da finanzas ha animau las vastas discussiuns da questa sera. Cheutras vesan ins l'impurtonza da quella fatschenta. Pertgei ils davos onns han ins saviu perseguitar ch'ils quens annuals han mintgamai provocau per liungas discussiuns. Tut quellas discussiuns laian denton buca pli midar la situaziun finanziaria. Ils quens ein screts ed aschia gia historia.

Cusseglia Theres Burri Gadola:

Nus havein pulitas investiziuns en la sparta infrastruttura, ina sparta ch'ei dil reminent bein calculabla. Ils ulteriurs facturs astgan tonaton buc ir en emblidanza. Pertgei era quels ein da gronda impurtonza per saver augmentar l'attractivitat dil vitg. Entgins impuls: saver porscher interessantas plazzas da lavur, in bien provediment da sanadad, ina scolaziun attractiva (*roms*) – evtl. ina scola bilinga – lavur sociala per geniturs ed affons eav. Quei ein facturs essenzials per ina convivenza attractiva ed in prospereivel futur.

Decisiun:

Sin fundament dallas ponderaziuns menziunadas ha il cussegl da vischnaunca priu enconuschientscha dil plan da finanzas 2022-2031.

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer



Cussegl da vischnaunca 2021/2024

Protocol no. 15

Seduta dils 22-06-2022

4. Ura da damondas (conform ad art. 44 dil regulativ da fatschentas)

Communicaziuns

President dil cussegl da vischnaunca Adrian Deflorin:

- Ils 25 da zercladur 2022 ha liug il "Trail Clean up" Sedrun/Mustér;
- ils 9 da fenadur 2022 ha liug il "Rheinquelle-Trail";
- ils 11 da fenadur 2022 ha liug en claustra in concert d'orgla cun Alois Koch e Jürg Brunner;
- per la festivitàd digl emprem d'uost 2022 organisescha la vischnaunca l'usitada fiasta avon casa communal. *Ei legrass da saver beneventar quella sera era cusseglier(a)s cun lur famiglias;*
- igl emprem d'uost ha liug igl usitau solver (*brunch*) sil bein puril dad Armin Manetsch e famiglia, Mumpé Medel;
- l'jamna dils 7-13 d'uost 2022 ha liug il "Paragliding Disentis Open 2022";
- ils 13 d'uost 2022 ha liug la fiasta dil vitg.

Il proxim cussegl da vischnaunca ha liug venderdis, ils 26 d'uost 2022.

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer

Disentis/Mustér, ils 27 da zercladur 2022